

**ANG**

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 16
Agosto 21, 2006
www.philippinerevolution.net

Editoryal

Rehimen nga garuk, butigon kag berdugo dapat na nga ibasura

Waay sing pagkabaraghal ginbasura nga liwat sang mga idu-ido ni Gloria Arroyo sa Kongreso ang kasong *impeachment*. Waay gani sini ginhatagan sang kahigayunan ang mga nagpasaka sang kaso nga basahon man lang ang listahan sag tuman kadamo nga naihanda nga ebidensya sang pagdinaya sa eleksyon, korapsyon kag pagpamatay sa mga aktibista kag iban pa nga mabug-at nga krimen ni Arroyo. Basta lamang pinatay sang mga kongresista nga maki-Arroyo ang kaso bangud wala kuno ini sang basehan.

Ang amo nga wala panugan-tugan nga paglapak sa mga proseso nga parlamentaryo kag ligal liwat nagpakita sang desperasyon ni Gloria Arroyo nga magkapyot sa poder. Sa pagbasura nga ini sang kasong *impeachment*, ginsara na sang rehimeng Arroyo ang nabilin nga parlamentaryong proseso nga ginalauman sang pumuluyo sa idalum sang subong nga Kongreso para mabuyagyag ang mga kasal-anan sang rehimen kag mabayluhan ini. Labi lamang nga ginahayag sang rehimeng Arroyo ang kaugalingon nga kagarukan, kadalukon kag pagkatuso, kag labi lamang sini nga ginahamulag ang kaugalingon sa pumuluyo. Bunga sini, labi nga nagalapad ang kubay sang pumuluyo nga nagapati nga wala subong sang iban nga

mapilian kundi ang dalhon ang away sa karsada kag sa armadong paagi agud matapos na ang di lehitimo, korap, papet kag brutal nga pagginahum ni Gloria Arroyo.

Ang pagbasura sa kasong *impeachment* amo ang pinakaulihi lamang sa malaba nga serye sang mahigko nga maniobra kag mapintas nga atake sa mga pwersa nga nagabato sa rehimeng Arroyo.

Kamot-nga-salsalon ang pangunahon nga sandigan ni Arroyo agud makapabilin sa poder. Paagi sa malaparan nga pagpamatay kag pagkuot sa mga aktibista, mga ginasuspetsahan nga rebolusyonaryo, iban pa nga mga kaaway sa pulitika kag pati mga inosenteng sibilyan, nagasabwag siya sang kakugmat sa desperadong handum nga paatrason kag dugmukon ang malapad nga kahublagan para patalsikon siya.

Lapnagon nga ginalapak ni Arroyo kag mga kahimbon kag idu-ido niya ang mga kinamatarung sibil paagi sang mga pasistang tikang kag mandu pareho sang pagdumili sa mga matawhay nga paghulag kag pagpang-aresto sa mga nagarali. Makahas nga ginalimitahan kag ginabungkag ang nagkalain-lain nga paghulag sang pumuluyo. Ginapakuot, ginapapatay ukon indi gani ginahunong ang iya mga pangontra. Naga-hari ang terorismo sang estado sa malapad nga kaumhan kag pati sa pila ka sen-



**Mga tampok sa
isyu nga ini...**

**Super regions:
Super-pantasya
ni Arroyo** PAHINA 4

**Kleriko-pasista nga
dokrtina ni Intengan** PAHINA 7

**Instrumento sg
pagpasilabot: Mga
humanitarian mission
sg US** PAHINA 12

trong banwa kag syudad kon sa diin nagapangibabaw ang mga pangunahon nga pasistang gaway ni Arroyo.

Kadungan sini, masupog nga ginagamit ni Arroyo ang nagkalain-lain nga pagmaniobra, pagliki-liki sa layi, tiko nga pangrasonan kag iban pa nga mahigko patiyug-tiyog nga taktika agud pat-uron ang mga institusyon kag rekursu sa idalum sang iya kagamhanan magserbi sa iya nga di lehitimo nga pagginahum kag nagapadayon nga pagpagusa diri. Tanan nga makaptan nga resorsa sang gubyrerno halin nasyunal tub-tub lokal nga lebel ginagamit agud maduso ang Chacha (pagbag-o sa konstitusyon) sandig sa disenyo ni Arroyo para makapalawig pa siya sa poder, matapna ang pumuluyo kag labi pa nga kawatan ang pungsod, kahimbon ang iya imperyalistang amo.

Ginagamit sang rehimen ang tanan nga paagi agud tabunan ang kamatuoran. Ginaabangan sini ang tanan nga pagtinguha sang Senado nga imbestigahan ang mga tampok nga kaso sang kagarukan sa pihak sang pagkilala sang Korte Suprema sa gahum sang Senado nga ipatawag sa mga pagbista kag imbestigasyon sini ang mga upisyal sang gubyrerno.

Isa sa mga pinakaulihi nga pagtinguha sang Malakanyang nga takpan ang kamatuoran amo ang pag-abang sini sa mga upisyal sang OWWA nga gin-imbatar nga mag-atubang sa imbestigasyon sang Senado angot sa nagakadula nga pondo nga dapat ginagamit papra sa pagpabakwit sang mga migranteng mamumugon sa Lebanon. Yara man ang kaso sang pagtago kay Jocelyn "Joc-joc" Bolante kag iban pa nga mga pangunahon nga imbolbado sa kagarukan angot sa mga pondo nga pang-agrikultura nga gingamit sa kampanyang elektoral ni Arroyo. Ginahuhulan man sang Malakanyang ang mga saksi sa nagkalain-lain nga krimen ni Arroyo kag mga kakomplot niya agud magbaliskad lkag himuon nga inutil ang mga imbestigasyon diri.

Wala untat ang pagbalay sang Malakanyang sang mga kabutigan para mapahamot, takpan ang mga kagarukan kag krimen nila, pagguwaon nga husto ang sala kag suportahan ang mga maitom nila nga

plano. Ginamanipula ang mga estadistika agud takpan ang pagdausdos nga kahimtangan sang ekonomya, ang kadamo sang mga nagaantos kag wala trabaho kag ang malala nga pagkabangkarote sang gubyrerno.

Samtang waay kaluoy nga ginapatuman sang rehimen Arroyo ang polisiya sang pagsabwag sang kakugmat paagi sa nagapadayon nga armadong pagpang-atake sa mga aktibista kag ordinaryong pumuluyo, pilit sini nga ginalikawan ang kriminal nga responsibilidad sa mga kaso sang pagpatay kag pagkuot. Ginadalag pa sini ang mga armado nga rebolusyonaryong pwersa sa mga krimen nga ini sa pagsiling nga ang mga ginapatay kag ginkuot biktima sang "purgahan" sa sulod sang rebolusyonaryong hublag. Sa atubang sang pangkalibutan nga kundenasyon sa pasismo sang rehimen, bag-ong pakuno-kuno na naman ni Arroyo ang pagnombrar sang bogus nga komisyon para imbestigahan kuno ang mga krimen nga ini.

May kutod ang pagpamigos, pagpamahog kag pagpaniplang sang rehimen Arroyo. Samtang ginapas- ingki sini ang terorismo kag pagpaniplang, labi lamang sini nga ginabuyagyag ang kaugalingon nga kagarukan, kalautan kag pagkapa- sista. Labi lamang nagalapad kag nagasingkal ang kaakig sang pumu- luyo kag kagustuhan nila nga mapahalin na ang rehimen.

Bisan sa luwas sang pungsod, nagadamo kag nagadamo ang numero sang mga organisasyon, sim- bahan, upisyal sang gubyrerno kag mga kahublagan nga nagapaka- malaut sa wala pili nga mga ar- madong atake sang mga pasistang gaway sang estado sa mga aktibista kag iban pa nga nagabato sa guby-



Tuig XXXVII No. 16 Agosto 21, 2006

Ang *Ang Bayan* ginabantala sa leng- wahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial

Rehimeng garuk, butigon, berdugo
dapat ibasura na 1

Kasong *impeachment* batuk kay Arroyo 3

Super-pantasya ni Arroyo 4

Bolante, ibalik sa pungsod 5

Pagpanghalit sg pasistang estado

Paglapas sa tawhanong-kinamatarung 6

Kleriko-pasista nga doktrina ni Intengan 7

Naga-ulan internasyunal nga kundenasyon 8

Mga opensiba sa Bikol 9

Mga tampok nga opensiba sa Leyte 9

Humanitarian mission sg US sa pungsod 12

Balita 14

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

Sundan sa "Editorial..." pahina 3

erno. Indi mapatihan sa internasyunal nga komunidad ang mga pagpanabon kag pagbinutig sang rehimen. Bangud sa naglap-ta na nga baho sang gubyerno nga ini bunga sang nagadamo nga mga pangpulitika nga pag-pamatay kag iban pa nga paglapak sa tawhanong kinamatarung, ang ngalan ni Gloria Arroyo ginapareho na sa pinakamapintas nga pasistang diktador sa kasaysayan pareho nanday Marcos, Pinochet kag Hitler.

Daku nga kasaypanan sang rehimen ang pagsara sini sang nagkalain-lain nga mga alagyan parlamentaryo kag iban pa nga matawhay kag ligal nga protesta. Nagadamgo ini sang bugtaw sa pagsiling natak-an na ang pumulu-yo sa pagbato kag pagmartsa sa karsada. Wala natak-an ang pumuluyong Pilipino sa 14 anyos nga paghimakas sa diktaduryang Marcos sa karsada man ukon sa kabukiran. Sang ulihi nagmadi-nalag-on sila nga patalsikon ang ginakangil-aran nga diktadurya.

Liwat sini ginapmatud-an sang pumuluyong Pilipino: Sa pi-hak sang mapintas nga pag-pamios kag pagbinutig sang garuk kag brutal nga rehimen-g Arroyo, padayon nga magasulong kag magasingki ang paghimakas sang pumuluyo para dalayon na nga mapalayas kag masilutan ang rehimen. Kadungan sang pagdagsa sang nagakaakig nga pumuluyo sa karsada, labi nga magasulong ang rebolusyonaryo nga armadong paghimakas agud dalayon na nga pukanon ang re-himeng Arroyo kag agumon ang dalagku nga pagbag-o sa katil-ingban padulong sa pag-agum sang matuod nga pungsodnon nga kahilwayan, demokrasya kag kauswagan. AB


Ibinasura sang Committee on Justice sang Kongreso

Impeachment ginbasura batuk kay Arroyo

Dali-dali nga ginbasura sining Agosto 16 sang Committee on Justice sang Kongreso ang kaso nga *impeachment* batuk kay Gloria Arroyo. Sa boto nga 56-24, liwat gin-sarhan sa tuig nga ini ang nabilin nga parlamentaryo nga proseso para mabuyagyag kag mapamatud-an ang mabug-at nga krimen kag salabton sa mga ini sang pasista, korap kag peke nga pangulo.

Sa ginabasura nga kasong *impeachment*, si Gloria Arroyo ginapa-sibangdan sang paglapas sa konsti-tusyon, kagarukan kag pagpang-abuso sa poder. Ginaunod sang *impeachment complaint* ang 22 partikular nga kaso lakip ang pagdinaya sa eleksyomga paglabag sa tawhanong-kinamatarung kag asasinasyon pulitikal kag pagbaton sang suhol sa jueteng.

Gininan-



pamilit sang mga maki-Arroyo nga kongresista nga "kulang sa basehan" ang kaso nga *impeachment* batuk sa pangulo bisan nga wala pa nabasa ang listahan man lang sang kinahon-kahon nga mga ebidensya sa mga kaso batuk kay Arroyo. Lakip diri ang pito nga kahon nga nagaunod sang mga dokumento sang mga *bank account* ni Arroyo sa iban nga pungsod, mga teyp, bidyo, testi-monya sang mga saksi kag iban pa.

Hungod nga baraghal nga gin-busalan sang Committee on Justice, nga ginalakipan sang mga kongre-sista nga kilala nga benepisyo sa P728 milyon nga "fertilizer scam" nga pangunahon ginadalalahan ni Arroyo kag unod man sang rekla-mong *impeachment*. Wala man delikadesa nga magpaiway ang anak ni Arroyo nga si Rep. Mikey Arroyo nga ipwera ang kau-galingon sa mga bista.

Sa kamot sang mas madamo nga numero sang mga bayaran ni Arroyo, pat-ud gid nga dalayon na nga ilubong ang kasong nga *impeachment* sa plenaryo sang Kongreso sa Agosto 23.

Bangud sa baraghal nga pag-bastos sa proseso nga *impeachment*, nagalapad subong ang panawagan para sa mga paghulag sa karsada kag *civil disobedience*. Lakip si Archbishop Cardinal Ricardo Vidal sa mga tawong-simbahan nga nagapanawagan sang paghulag sa karsada. AB

"Super-regions" kag iban pa

Super-pantasya ni Arroyo

May bag-o na naman nga pantasya nga ginalibod si Gloria Arroyo. Siling niya sa ika-ano nga State of the Nation Address (SONA), maangkon na kuno sang Pilipinas ang pusisyon sang First World-pareho sang US-sa sulod lamang sang 20 tuig paagi sa ginalarawan niya nga mga "super proyekto."

Kon usisaon wala naman sang ginhimo si Arroyo kundi tulungan ang kapuluan sa apat ka punsok nga binansagan niya nga mga "super-region" ukon "mega-region": may isa sa naaminhang Luzon, may isa pa nga nagasakup halin Central Luzon tubtub Southern Tagalog, isa pa nga nagasakup sa Bicol kag Visayas, kag pinakaulihi ang nagasakup sang Mindanao. Ang mga ini pagabutangan kuno niya sang mga proyekto nga imprastruktura nga yabi sa pagangkon sang kauswagan kag paglubad sa kaimulon.

Nakibot na lamang ang iban nga mga upisyal nga nagaasikaso sa ekonomya bangud madamo sa ginhilera nga mga proyekto ni Arroyo tapos na ukon indi yara sa proseso nga nagahingapos, pero ginapagguwa nga kabahin sa mga bag-o niya nga "super proyekto." May iban naman nga wala pa maplanuhan. May mga plano indi lamang nga sobra nga mahal kundi madamo nga kahalitan nga tugahon sa pumuluyo, pareho sang pagpalapad sang San Roque Multipurpose Dam. Madamo man nga wala basehan kag indi matuod, pareho sang ginapagguwa ni Arroyo nga potensyal sang Ilocos kag Cordillera para magsuplay sang isda sa pungsod samtang kumparar sa iban nga lugar sa Pilipinas tigo gani ang isda didto.

Labaw sa tanan, daku nga palaisipan sa mga ekonomista sang

gubyerno kon sa diin pagakuhaon sang bangkarote nga rehimeng Arroyo ang ginatantya nga P372 bilyon tubtub masobra P1.7 trilyon nga kinahanglanon para sa mga "super proyekto" nga ini. Wala gani nati-gayon sang gubyerno ang sensus nga dapat na himuon sadto pa nga

2005 bangud sa kakulangan sang pondo. Indi man gid makasalig lagi ang gubyerno sa ayuda sang manggaranon nga pungsod. Bangud sa kapaslawan sang gubyerno nga magpatuhaw sang katumbas nga pondo, sadto pa nga 2003 kinansela na sang Japan Bank for International Cooperation (dati nga Japan Overseas Economic Cooperation) ang ginatigana sini nga "official development assistance"

(ODA), gani nakapondo ang 11 proyekto nga nagabalor sang P24 bilyon.

Sa kalalaon sang krisis sa ekonomya sang pungsod, ang solo makuhaan subong sang rehimen sang pondo para sa mga "super proyekto" sini amo ang dugang nga pagpangutang sa mga internasyunal nga usurero nga nagahigop na sang 80% sang aton pungsodnon nga produksyon sa porma sang bayadutang kag dugang nga buhis nga ipanaog sa pumuluyo.

Ang matuod nga kahimtangan sang pungsod. Samtang nagapanta-

sya si Arroyo, nagalumoy naman ang pumuluyong Pilipino sa malubha nga kaimulon.

Ginapakita sang pinakaulihi nga sarbey sang Ibon Foundation (Hunyo 28-Hulyo 7) nga labing nagadamo kag nagaabot na sa 69.3% ang mga Pilipino nga nagasiling sila nagakalisod. Nagaabot na sa 43% ang wala trabaho ukon kulang ang kita. Kulang nga kulang ang P300 minimum nga adlawan nga sweldo sa P675.54 kada adlaw nga kinahanglanon sang isa ka anum-katawong pamilya para mabuhing disente.

Samtang, 75% sang mga negosyo ang nagapangayo halin sa Department of Labor and Employment sang eksemplasyon sa pagpatuman sang layi sa minimum nga swelduhan bangud wala sila sang ikasarang nga ihatag ini. Paktor ini sa pagluwas sa pungsod sang masobra 3,000 Pilipino kada adlaw para didto magpangita sang makitaan nga trabaho.

Madamo man sa gingamit nga basehan nga estadistika ni Arroyo ang lunsay mga kabutigan. Halimbawa sini ang pahayag niya nga nagtaas sang 30% ang kita sang pinakaimol nga pamilya. Kabaliskaran diri, nagnubo ang pangkabilugang kita sang mga pamilya sang halos 13%. Sa pinakaimol nga pamilya, nagnubo pa ini sang dugang nga 4%. Indi man matuod nga nagnubo na ang numero sang pumuluyo nga nagkaagi sang kaimulon. Bisan sa ginmanipula nga datos sang gubyerno, nagaabot lamang sang 3% sang pumuluyo ang bahin nga nag-ayo ang pangabuhian. Suno sa Ibon Foundation, "Anuman nga pagtiko sang mga estadistika kag mga pantasya indi makatabo sang kamatuoran bahin sa matuod nga kabuhing-pang-ekonomya sang pungsod kag sang pumuluyo sini."

Sa iya sermon sa misa matapos ang SONA ni Arroyo, ginhimutig man

Gilayon nga pagpabalik kay Bolante sa pungsod, ginainsister

Ginainsister sang Senado, ligal nga oposisyon kag sang nagkalain-lain nga sektor ang gilayon nga pagpabalik halin sa US kay Jocelyn "Joc-joc" Bolante, anay Undersecretary sang Department of Agriculture (DA), agud atubangon ang kaso sang pagpangawat nga ginpasaka kontra sa iya sa Office of the Ombudsman.

Masobra isa ka bulan na nga nakahunong si Bolante sa US. Ginaresto siya sadtong Hulyo 7 pagkahugpa niya sa erport sang Los Angeles, California sa indi pa maathag nga mga dahilan. Nagtalanang korte sa US sang pyansa nga \$100,000 (P5 milyon).

Sa abiso sang mga upisyal sang rehimeng Arroyo, wala nagpyansa si Bolante kag sa baylo nagpasaka sang petisyon para sa *asylum* agud makalikaw sa deportasyon kag mapalawig ang pagtener sa US tubtub lima ka tuig kag sa sini makalikaw nga mapabalik sa Pilipinas para direkta nga maibestiga kag maka-

suhan siya sang pagpamuyong. Ginbangdanan niya nga plano kuno nga patyon siya sang Bag-ong Hangaway sang Banwa, makahalam-ot nga bagay nga gilayon ginpangin-wala sang BHB.

Nagpasaka sang petisyon ang mga abugado kag eksperto sang UP College of Law batuk sa hingyo ni Bolante nga hatagan sang *asylum*. Ginaathag nila nga nagpalagyo si Bolante sa Pilipinas bangud sa mga kaso sang korapsyon kag indi bangud sa pangpanghingabor sa pulitika ukon pagpati.



Sandig sa rekomendasyon sang Senado, nakatalana nga pasakaan sang kaso nga pagpangawat sa Office of Ombudsman sanday Bolante kag sadto anay DA Secretary nga si Luis "Cito" Lorenzo kaangot sang mga iligal nga transaksyon kag pangurakot sa P728 milyon nga pondo nga pangbakal tani sang abono kag iban pa nga gamit sa panguma.

Suno sa imbestigasyon sang Senado, gingamit ni Arroyo ang pondo nga ini agud suhulan ang mga kongresista kag lokal nga pulitiko para suportahan ang iya kampanya sa pagkapresidente sadtong 2004. Gintumod sa imbestigasyon sang Senado nga si Bolante ang pinaka-opereytor ni Arroyo sa operasyon nga ini.

AB

"Pantasya..." halin sa pahina 4

ni Bishop Antonio Tobias sang Novaliches ang indi matuod nga mga pahayag sang pekeng pangulo. Gamit ang sarbey sang Social Weather Stations, ginsiling sang obispo nga 66.7% sang mga Pilipino ang indi makabakal sang bastante nga pagkaon; 64% ang nabudlayan na makabayad sang kuryente, tubig kag iban pa nga serbisyo; 63.7% ang nabudlayan na makabayad sang matrikula sang ila mga anak; kag 62.5% ang wala na sang ikasarang magpabulong ukon magbakal sang bulong. Ginahimutig man niya ang ginasiling sang Malakanyang nga 11% na lamang ang wala trabaho. Siling niya, masobra pa sa 16% ang wala trabaho kag mas daku pa ang numero sang mga kulang ang palangitan-an. Ginpakamalaut man sang obispo ang daku nga pagpang-into sang gubyrerno sang panubun sini ang ginatawag nga "sukatan sang kaimulon" halin sa P53 kada adlaw pakadto sa P34 kada adlaw. Ang nagakita sang masobra P34 kada adlaw, suno kay Arroyo, indi mabilang nga imol. Gintumod man sang obispo ang problema sang tuman kabug-at palas-anon nga utang sang pungsod kag kawad-on sang tunay nga pang-ekonomya nga pag-uswag.

AB

"Super-korapsyon"

Bisan wala sing maathag nga malauman ang pumuluyo sa mga "super-region" kag "super project" nga padihot ni Arroyo, indi maitago ang daku nga grasya ang pat-ud nga agumon halin diri sang mga Arroyo kag mga taga-Malakanyang, amo man sang mga kroni kag suod nga abyan sang pamilyang Arroyo kag mga gaway nila sa Kongreso, sa nasyunal kag lokal nga gubyrerno kag sa AFP kag PNP.

Ang padihot nga "super-region" nagakahulugan sang pagbutang sang isa na naman ka indi kinahanglanon nga andana sa tunga sang nasyunal kag lokal nga burukrasya. Magaserbi lamang ini nga alagyan sang pondo nga kurakuton sang mga upisyal, luwas pa sa pagsiguro nga mapain ang pinakadaku nga parte para sa Malakanyang kag mga idu-ido ni Arroyo. "Super-korapsyon" ang igabunga sang padihot nga "super-region."

Ginasakyan sang pasistang militar kag pulisya ang padihot nga "super-region" sa katuyuan nga mas piguson nila ang pumuluyo. Suno sa hepe sang AFP nga si Gen. Hermogenes Esperon, amot sang AFP kag PNP kaangot sa "super-region" ang pagpat-ud sang "siguridad sa palibot" para mangin matalunsay ang mga mamumuhunan diri.

AB



Tawhanong kinamatarung, padayon nga ginalapakan sang rehimen

Wala kaluoy ang ginahimo nga pagpang-atake sang reaksyunaryong militar sa mga lider kag myembro sang mga militanteng grupo ilabi na sa Central Luzon. Sa pihak sang malaparan nga pagpakamalaut sa mga paglapas sa tawhanong kinamatarung, padayon ang wala renda nga atake sa pumuluyo sang mga suldado sang gubyrerno sa idalum sang kumand ni Maj. Gen. Jovito Palparan, Jr.

Agosto 17. Ginpangmarkahan sang ekis nga pula sang mga elemento sang 69th IB ang pwertahan sang balay sang pila ka katapu sang Kadamay sa Balaba, Dau, Mabalacat, Pampanga.

Agosto 16. Pinatay si Julie Vasquez, tserman sang Kilusang Magbubukid ng Pilipinas sa Nueva Ecija kag kagawad sang barangay sa Culong, Guimba. Ginluthang siya bandang alas-9 sang gab-i samtang nagapamelasyon sa isa ka namatay nga abyan sa isa ka balay malapit sa detatsment sang 71st IB sa Culong. Sining ulihi lang mabaskog nga ginkundenar ni Vasquez ang mga pang-abuso militar sa prubinsya kag ang pwersahan nga pagpakuha sang sedula sa mga tagabaryo. Napulo'g lima ka bala sang M16 kag kal. 45 ang umutas sa kabuhi ni Vasquez.

Sadtong adlaw man nga ini ginluthang tubtub mapatay si Danilo de Leon, isa ka drayber sang traysikel, sa Barangay Sukol, Calumpit, Bulacan. Ginasuspetsahan nga tagasuporta siya sang BHB.

Agosto 15. Ginpatay sang duha ka armadong lalaki si Orlando Rivera, 40, sa sulod sang iya balay sa Barangay Binuangan, Obando, Bulacan bandang alas-2 sang kaaganhon. Nag-angkon sang tatlo ka tama sang bala ang biktima. Katapu si Rivera sang Pamalakaya sa Obando.

Ginpinturahan man sang ekis sang mga ginadudahan elemento sang militar ang pwertahan sang

mga balay nanday Sonny de Armas, tagapangulo sang Pamalakaya-Obando kag utod niya nga si Ricardo de Armas. Sadtong isa ka tuig pa ginapangita sang militar ang mag-utod. Ginkundenar sang Pamalakaya ang paglakip sang 10 katapu sini sa Obando sa *order of battle* ukon listahan sang mga pagapatyon sang mga idu-ido ni Palparan.

Agosto 10. Ginpatay si Gilbert Jamile, 40, sang Sityo Buntog, Barangay Canlubang, Calamba City samtang nakasakay sa iya motorsiklo upod ang iya bayaw. Nagapauli sadto sila halin sa Storck Phil. kon sa diin nagatrabaho si Jamile. Board member kag organisador si Jamile sang Samahan ng Magsasakang Nagkakaisa sa Buntog (Samana-Buntog), utod nga organisasyon sang KMP.

Agosto 8. Yara sa malubha nga kahimtangan subong sa ospital si Patricio Manahan, 32, myembro sang Bayan Muna matapos siya ginluthang sa Barangay Panasahan, Malolos, Bulacan. Nagapanyapon ang magpamilya sang makabati sang lupok sa guwa sang ila balay. Sang ila ini usisaon amo nga ginluthang sa tupad mismo sang ila

balay si Manahan. Naigo siya sa liog, lawas kag batiis.

Agosto. Lapnagon sa Nueva Ecija ang mga abuso militar kadungan sang pag-obligar sang AFP sa tanan nga pumuluyo nga magkuha kag permi magdala sang ila mga sedula. Isa ka 30 anyos nga empleyado sang gubyrerno na nakalabay sa tsekpoynt sang Philippine Army kag nakalimtan ang iya sedula sa balay ang ginpauli nga nakahublas bilang silot sa iya. Ginpakaon naman sa isa ka tindera ang ginadala-dala niya nga sedula bangud daan na ini.

Amo man ang gindangtan sang isa ka tserman sang barangay nga daan man ang dala na sedula. Ginsampal kag ginsumbag sa tiyan ang isa ka pobre nga tigulang nga babaye sang pamangkuton niya sa mga nagasita nga suldado nga "Pati ako pa, nagakinahanglan pa sang sedula?"

Magatatlo ka simana na nga nagapatuman sa mga banwa sang Nueva Ecija sang *curfew* halin alas-9 sang gab-i tubtub alas-4 sang kaaganhon.

Nagapamalay-balay man ang militar nga may dala nga listahan kuno sang mga nagasuporta sa BHB. Ginaisip man nila ang mga plato sa balay kag ginaakusahan nga nagapakaon sang mga Pulang hangaway ang pamilya kon sobra sa numero sang pamilya ang ila mga pinggan.

AB

Kleriko-pasista nga doktrina ni Intengan

Isa ka hayagan nga pasistang ideolohiya ang yara sa likod kag dugang nga nagaduso sa mga pagpamatay, pagtortur kag pagkuot sa mga aktibista kag mga ginaakusahan sang militar nga nagasuporta sa rebolusyonaryong kahublagan. Ginahuksan na sini ang mga demokratiko nga pakitang-tawo sang papet nga republika kag ginahayag ang pinakabasehan nga kinaiya sang reaksyunaryong estado bilang isa ka mapintas nga instrumento sang reaksyunaryo nga makasahing pagginahum.

Ini ang linya nga ginatib-ong ni Fr. Romeo Intengan, kleriko-pasistang "religious adviser" ni Gloria Arroyo, tagapundar sang PDSP (Partido Demokratiko Sosyalista ng Pilipinas), isa ka masupog nga anti-komunistang grupo nga nagagamit lamang sang pangalan nga sosyal-demokratiko. Kapartido kag katuwang siya sa ideolohiya sang subong nga National Security Adviser ni Arroyo kag Chairman sang PDSP nga si Norberto Gonzales. Hugot ang kaangtanay kag paghim-bunanay sang duha nga ini sa Central Intelligence Agency sang US. Si Fr. Intengan subong ang nagaserbi nga pang-ideolohiya nga ubay kag manunudlo sang rehimeng Arroyo kag sang mga armadong pwersa sini sa pagpatuman nila sang todolarga nga pasistang pagpanalakay sa pumuluyong Pilipino.

Ginpahambal sining karon lang si Intengan sa atubang sang National Defense College, mataas nga buluthuan sa Pilipinas para sa halambalanon militar kag seguridad, agud iladlad ang pag-ideolohiya nga basehan kag rason sa ginahimo nga wala hawid nga pagpamatay kag todo nga kalakasan sang mga armadong pwersa sang estado batuk sa pumuluyo. Suno sa malaut nga pasistang pagrason ni Intengan, sa idalum sang internasyunal nga makatawo nga layi, kinahanglan bi-


langon sang AFP nga mga "kombatant ukon nagadala sang armas" indi lamang ang mga hangaway sang Bag-ong Hangaway sang Banwa (BHB) kundi pati ang linibu-libo tubtub ginatus-gatos kalibo nga nagasuporta sa armadong rebolusyon. Siling niya, mga tago nga myembro pa gihapon sila sang mga milisya sang pumuluyo kag kwerpo sa pagdepensa-sa-kaugalingon sang rebolusyonaryong hublag.

Ang doktrina nga ini ni Intengan ang pinakaubod sang tanan nga sanga-sanga nga malaut nga hilikuton sang reaksyunaryong militar-hayagan man ukon paagi sang mga ginakontrol nila nga sikretong "death squad"-halin sa ginahimo nga pagkuot, *saturation drive*, pagpataw sang awtoridad sang militar kag pagsabwag sang kakugmat sang terorismo. Ini ang pinakadiwa sang

Oplan Bantay Laya sang AFP kag maitom nga inspirasyon sa likod sang uhaw-sa-dugo nga pasistang pagpanghalit ni Maj. Gen. Jovito Palparan sa Central Luzon kag sang AFP sa nagkalain-lain nga bahin sang pungsod. Halos 730 na nga mga aktibista ang ginpatay sa ngalan sang doktrina nga ini ni Intengan kag libu-libo pa ang biktima sang nagkalain-lain nga porma sang kalakasan militar kag paglabag sa tawhanong-kinamatarung.

Pareho sang imperyalismong US, hayagan nga ginatiko sang Doktrinang Intengan ang tanan nga establisado nga pagsulundan kag makatawong layi sa paglunsar sang gera. Baliskad sa katuyuan sang internasyunal nga makatawong layi nga amligan ang mga sibilyan kag mga pwersa nga indi imbolbado sa gera, wala sang ginahimo nga pagtuhay ang Doktrinang Intengan sa mga armadong pwersa kag sa pumuluyo nga wala armas.

Ang Doktrinang Intengan isa ka doktrina sang kalainan kag kalakasan. Sa ubay sang doktrina nga ini, ang mga pusil sang mga suldado nga AFP ginatumod, indi sa mga armado nga kaaway sini, kundi sa mga aktibista kag ordinaryong pumuluyo. Isa ini nga doktrina nga wala pasikadtuan kundi ang labi pa nga pag-ilig sang dugo sang pumuluyong Pilipino. Pero baliskad sa handum nila nga makasabwag sang kahadlok, ang pag-ilig sang dugo magabunyag sa kaakig, kaisog kag determinasyon nga magbato sang pumuluyong Pilipino.





"All-out war" sang rehimeng US-Arroyo

Ginaulan sang internasyunal nga kundenasyon

Padayon nga ginaulan sang pagpakamalaut ang kampanya sang mala-paran nga pagpamatay kag pagkuot sang papet kag pasista nga rehimeng Arroyo halin sa mga internasyunal nga organisasyon nga nagatib-ong sa tawhanong-kinamatarung, mga tawong-simbahan, organisasyon sang midya kag pati sang mga kaalyado sini sa guwa sang pungsod.

Ginapatingkad sini ang labing pagkahamulag sang rehimeng Arroyo sa internasyunal nga komunidad. Ang mga pahayag kag pagpakig-unong sang mga dumuluong nga organisasyon kag institusyon nagahatag sang kusog kag inspirasyon sa pumuluyong Pilipino agud labi pa nga maghimakas para mapatalsik si Arroyo.

Suno sa Amnesty International sa report sini nga Agosto 15, dapat mahuya ang rehimeng Arroyo sa kapaslawan sini nga amligan ang kabuhi sang mga Pilipino kag sa kawad-on nila sang kahilwayan magpabutyag kag mag-organisa. Ginahatagn atensyon sang AI ang pagdamo kada tuig sang mga kaso sang paglabag sa tawhanong-kinamatarung sa idalum sang rehimeng Arroyo.

Gintumod sang AI nga madamo sa mga ginapamatay mga aktibista kag myembro sang mga progresibong partido kag organisasyon nga malinong nagahulag sa balayon sang subong nga sistema. Ginatarget sila bangud sa akusasyon sang AFP kag sang rehimen nga mga myembro ukon tagasuporta sila sang Partido Komunista sang Pilipinas (PKP). Dapat kuno nga igakuya sang rehimeng Arroyo ang kawad-on sang mga kinamatarung sa hilway nga pagpahayag kag paghulag sang pumuluyo diri.

Luwas sa panugyan sang AI nga liwat buksan ang sugilanon pangkalinunangan, ginasuhestyon man sini ang pag-imbatar sa pungsod sang UN Special Rapporteur on

Extrajudicial Executions, sang Special Representative on Human Rights Defenders kag mga tiglawas sang Working Group on Arbitrary Detention. Bag-o sini, nanawagan ang Philippine National Red Cross-International Humanitarian Law Committee (PNRC-IHLC) nga untaton na ang "all-out war" sang rehimeng Arroyo batuk sa BHB kag tanan-nga-bahin nga pagrespeto sang internasyunal nga makatawong layi.

Ginapamilit naman sang United Methodist Church-USA sa gubyrnong Arroyo sining Agosto 17 ang

paghimo sang imbestigasyon sa mga kaso sang pagpatay ilabi na sa mga tawong-simbahan. Sa 18 nga ginpatay nga mga lider sang simbahan sa nagtaliwan nga duha ka tuig, 15 mga katapu sang UMC. Kadungan sini, nagpagguwa man sang pahayag ang mga lider sang mga simbahan nga nagatiglawas sang nagkalain-lain nga sekta halin sa tanan nga mga kontinente sang kalibutan. Separado pa nga nanawagan ang Uniting Church of Australia para sa pareho nga imbestigasyon.

Wala man sang salig ang Asian Human Rights Commission (AHRC) sa gintalana ni Arroyo nga dedlayn para sa paglubad sang mga kaso sang pagamatay. Indi ini seryoso, siling sang AHRC, kag kulang ini para maatubang ang malala nga problema sang mga pangpulitika nga pagpamatay.

Kadungan sini, ginahikayan sang Reporters Sans Frontieres (RSF), internasyunal nga organisasyon sang mga mamahayag ang pagpabugal sang rehimen bangud lamang nakatudlo na ini sang pila ka suspek kag nakapasaka sang pila ka kaso kaangot sang pagpatay sa duha ka myembro sang midya.

Samtang, gintudlo sang International Peasant Solidarity Mission (IPSM) nga mga elemento sang militar ang yara sa likod sang mga kaso sang paglapas sa tawhanong kinamatarung sa pungsod. Ang pahayag nga ini nakabase sa mga resulta sang *fact-finding mission* nga ginhimo sang IPSM sadtong Agosto 6 kag 8 sa pagbuligay sa Kilusang Magbubukid ng Pilipinas, Asian Peasant Institute kag Tanggol Magsasaka.





Ipatuman ang CARHRIHL--Red Cross, AI

Ginarekomenda sang Amnesty International (AI) kag Philippine National Red Cross (PNRC) sa duha ka separado nga pahayag ang hugot nga pagpatuman sa Comprehensive Agreement on Respect for Human Rights and International Humanitarian Law CARHRIHL).

Suno sa AI, yabi ang CARHRIHL sa pag-atubang sa pagpang-abuso kag paglapas sa tawhanon nga kinamatarung sa panahon nga wala sang *ceasefire* sa tunga sang GRP kag rebolusyonaryong kahublagan. Bisan pa man, ginakilala sang AI nga wala

naabot ang lubos nga potensyal sang CARHRIHL tuga sang wala sang estabilidad nga negosasyon pangkalinungan. Ginsaway man sini ang pagpasilabot sang US kag UE sang ilakip sang mga ini ang PKP kag BHB sa listahan sang mga "dumuluong nga terorista nga organisasyon" nga nag-epekto sa negosasyon pangkalinungan.

Suno sa naman sa PNRC, sampat ang mga probisyon sang CARHRIHL para pat-uron ang hugot nga pagpatuman sa mga internasyunal nga makatawo nga layi sa gera sang

duha ka bahin.

Malipayon nga ginbaton sang NDFP ang mga rekomendasyon sang AI kag PNRC. Nagpahayag ini sang kagustuhan kag kahandaan nga makipagnegosasyon sa rehimeng Arroyo.

Bag-o sini, nagproponer ang NDFP sang pagtukod sang independyente nga komite para maghiwat sang imbestigasyon sa nagadamo nga kaso sang desaparacidos, pero ginbalibaran ini sadto sang GRP. AB

Mga ginkuot, ginapalutaw sa AFP

Ginmandu sang Korte Suprema sa AFP kag mga upisyal pangseguridad sang gubyerno nga ilutaw ang tiglawas sang NDFP-Bicol nga si Rogelio Calubad, ang anak niya nga si Gabriel kag si Philip Limjoco, upod sanday Prudencio Calubid kag iya asawa nga si Celina Palma, Leopoldo Ancheta, Roland Porter, Ariel Beloy kag Gloria Soco. Ang mga mandu ginpagguwa sadtong Agosto 17 kag 18 bilang sabat sa mga petisyon sang mga himata sang mga desaparacidos para sa *writ of habeas corpus*. Ang pagpalutaw kanday Calubad nga ginmandu sang Korte Suprema sa mataas nga upisyal sang AFP, kay National Security Adviser Norberto Gonzales kag Defense Secretary Avelino Cruz.

Katulad sang ginalauman, ginbalibaran sang mga upisyal sang AFP nga yara sa ila ang nadula nga mga aktibista. Bag-o sini, ginbalibaran man sang AFP nga yara sa ila sanday Karen Empeno kag Sherlyn Cadapan, duha ka estudyante nga ginkuot sang mga elemento sang 7th IB sa Hagonoy, Bulacan sadtong Hunyo 26. Nauna na nga pinaboran sang korte ang petisyon para sa *writ of habeas corpus* sang pamilya sang mga ginkuot nga estudyante.

Samtang, ginapabugal sang Task Bulacan sadtong Hunyo 26 nga may nadakop kuno sila nga duha ka babaye nga myembro kuno sang Bag-ong Hangaway sang Banwa nga ginahingalanan nila nga Ka Siera kag Ka Tanya. Ginsulit pa ini Maj. Gen. Jovito Palparan sa telebisyon sang masunod nga simana. Nagkadto ang mga pamilya kag abugado nanday Empeno kag Cadapan sa kampo sang Task Force Bulacan para pangitaon kag kilalahon ang duha ka babae nga Pulang hangaway pero wala sila sang naabtan didto. AB

Komisyon nahanungod sa pagpamatay, kinundena

Peke kag pangtabon lamang-ini ang reaksiyon ni NDFP Senior Consultant Jose Maria. Sison sa napabalita nga panugyan ni Gloria Arroyo nga magtukod sang espesyal nga komisyon nga maga-imbestiga sa mga pangpulitika nga pagpamatay sa pungsod. Mangin alagyan lamang ini sang mga malisyoso nga pahayag sang rehimen kontra sa mga biktima, ligal nga oposisyon kag sa rebolusyonaryong kahublagan bangud nakasalig lamang ini sa mga peke nga imbestigasyon sang ahente nga pulis ni Arroyo, siling ni Sison. Sa amo man, gusto sini nga balewala-on ang kaugalingon nga Commission on Human Rights nga madugay na nga nagapanawagan para pasabton ang rehimen.

Ginyaguta man ni Sen. Consuelo "Jamby" Madrigal ang komisyon. Gintawag niya ini nga "arogante kag wala sa lugar." Sa baylo, siling niya, dapat pasugtan nga mag-imbestiga ang mga eksperto sa tawhanon nga kinamatarung halin sa United Nations kag liwat nga tukuron ang Joint Committee on Human Rights nga magasikas sa implementasyon sang CARHRIHL. Ginapamilit ni Madrigal nga dapat tagaan sang rehimen sang danyos ang mga pamilya sang mga biktima, untaton na ang "all-out war" kag pahalinon si Maj. Gen. Jovito Palparan.

Samtang, nagabukas ang BAYAN kag iban pa nga organisasyon nga target sang mga pagpamatay nga magbuligay sa komisyon base sa pila ka kondisyon, pero indi madula ang ila mga pagduda nga may signipikante ini nga maagum. AB



Mga taktikal nga opensiba sa Bicol

Ginsalakay sang BHB ang isa ka detatsment sang CAFGU sa San Jose, San Vicente, Camarines Norte sining Agosto 9. Nakaagaw ang mga Pulang hangaway sang isa ka M60 masinggan, isa ka M16, isa ka M14, isa ka karbin, isa ka kalibre .45 pistola kag iban pa nga gamit militar.

Samtang, wala ginatahod sang Armed Forces of the Philippines (AFP) ang gindeklarar nga untat-linupok sa palibot sang Mayon sang salakayon sang mga pwersa sang 9th Infantry Division ang isa ka yunit sang Bag-ong Hangaway sang Banwa (BHB) sadtong Agosto 16 sa Sua, Malinao, Albay. Ang barangay nga ini yara sa sakup nga 15-kilometrong erya sa palibot sang nagalburuto nga bulkang Mayon kon

sa diin nagdeklarar sang untat-linupok ang National Democratic Front-Bikol.

Hungod nga ginlikawan sang BHB nga makaengkwentro ang mga suldado nga nagapatrulya sa erya pero ginlagas gihapon sila sang mga ini. Napilitan ang mga gerilya sang BHB nga magbato para depensahan ang ila kaugalingon kag gilayon nga makalayo sa atake sang kaaway.

Ginapakita sini ang katuntuhan sang ginasing sang 9th ID nga didto ang ma pwersa sini para magbulig sa *relief and evacuation*. Ginako mismo sang 9th ID diri nga wala nila ginarepeto ang untat-linupok sang NDF-Bikol kag wala sila sang intensyon nga tumbasan ini.

Antes sini, nagkoro sa pag-

binutig ang 9th ID, nasyunal nga pamunuan sang AFP kag Malakanyang sang pagguwaon nila nga imbolbado sa *relief and evacuation* ang mga suldado nga napilasan sang salakayon sang BHB sng hedkwarters sang 901st Brigade sa Villahermosa, Daraga, Albay sadtong Agosto 8. Ang matuod, ang mga nasambit nga suldado sadto nagabantay lamang sang ila kwartel, nga masobra 20 kilometros ang kalayuon sa Mayon, kag malapit sa lindero sang Albay kag Sorsogon.

Apat ka suldado ang napilasan sa pagpanalakay nga ini. Ang 901st IBde ang responsable sa madamo nga pagpamatay kag iban pa nga paglabag sa tawhanong kinamatarung sa Albay kag Sorsogon. **AB**

Mga tampok nga taktikal nga opensiba sa Leyte

Nakahinun-anon sang *Ang Bayan* ang duha ka upisyal sang BHB-Mt. Amandewin Command sa isla sang Leyte sining Hunyo 2006 nahangod sa mga kadalag-an nga naangkon nila sa patag sang armadong paghimakas. Ginsaysay nila ang ginhimo nga mga paghanda kag mga nangin paktor sa likod sang duha ka madinalag-on nga taktikal nga opensiba nga ginlunsar sa isla subong nga tuig-ang reyds sa Albuera sadtong Enero 6 kag ang ambus sa Villaba sadtong Mayo 5.

Ang Albuera yara nakatungdang Leyte kag 14 kilometros lamang ang kalayuon halin sa Ormoc City. Ang Villaba naman yara sa naaminhan-nakatundang Leyte. Pareho nga nagaantos sang masingki nga pyudal kag malapyudal nga pagpanghimulos ang pumuluyo sa duha ka banwa nga ini. Pero napanday man ang pumuluyo



sa kadamo, kapagsik kag mga naani nga kadalag-an sa mga agraryong paghimakas nga ginalunsar nila. Bunga sini, labing nagabaskog ang ila suporta sa rebolusyonaryong hublag.

Bunga sang mga paghimakas nga ginlunsar nila, target subong sang mga atake sang militar ang pumuluyo sa mga banwa nga ini. Partikular sa Albuera, nagtukod ang kaaway sang isa ka kusog-kumpanya nga detatsment halin sa 19th IB sang Philip-

pine Army. Ang pagpang-abuso sang militar labi nga nagpalig-on sa determinasyon sang masa nga suportahan ang BHB.

Reyds sa Albuera

Madinalag-on nga nalunsar sang BHB sa idalum sang Mt. Amandewin Command ang reyds sa hedkwarters sang PNP sa munisipyo sang Albuera sadtong Enero 6. Nakibot ang mga pulis sang gulpe nga nagpondo sa atubang sang ila detatsment ang tatlo ka salakyan nga may karga nga mga gerilya sang BHB.

Anum sadto ang pulis nga yara sa istasyon-duha ang nagagwardya sa pwertahan, tatlo ang yara sa kusina kag ang isa nagkadto sa tindahan.

Gilayon nga nadakup ang duha ka gwardya nga pulis samtang ang

mga yara sa kusina kag yadto sa tindahan nagsarurot dalagan.


Ginsipot gilayon sang mga Pulang hangaway ang arsenal sang kwartel. Nakakumpiska nila ang 32 armas: 20 M16, siyam nga .38 rebolber, isa ka super .38, isa ka .40 kalibreng pistola kag isa ka .22 nga rebolber. Nakakumpiska man sila sang 98 magasin kag masobra 3,000 bala, bukod sa teleskopyo, *transceiver base radio*, malahalon nga dokumento kag iban pa nga kagamitan. Naglawig lamang sang 25 minutos ang reyd. Ang duha nga gindakup nga pulis ginbuhian man matapos mapat-ud nga wala sila sang mabug-at nga kasal-anan sa pumuluyo.

Suno sa Pulang kumander nga namuno sa nasambit nga reyd, si Ka Nado, ang gintigayon nga pagsalakay sabat sa panawagan sang PKP nga maglunsar sang mga taktikal nga opensiba para mapadasig ang pagkapukan sa pasistang rehimen US-Arroyo. Katuyuan man sini nga agumon ang hustisya para sa mga biktima sang madamo nga paglabag sa mga pulis sa Albuera sa tawhanong kinamatarung sang pumuluyo. Sa amo man, katuyuan sang nasambit nga taktikal nga opensiba nga konsolidahon ang baseng masa, pataason ang ikasarang militar sang BHB kag magdugang sang armas para sa nagadaku nga pwersa sang hangaway sang banwa.

Bag-o ang aktwal nga paglunsar sang taktikal nga opensiba, naglunsar sang mga pagtuon para makonsolidahon sa pulitika kag militar ang hangaway sang banwa kag masiguro ang kahandaan sini sa inaway. Gintukod sang seksyon pangpulitika sa platun sang BHB ang plano para sa konsolidasyon sang hangaway. Kabahin sini ang pagtuon sang CARHRIHL.

Niresolba man ang pila ka prob-

lema kag bagahe kaangot sa pagpatuman sang nasambit nga operasyon. Ginsabat ang tanan nga kinahanglanon, halin sa mga teknikal na aspeto tubtub sa pagpataas sa pisikal nga ikasarang sang mga magasalakay nga pwersa. Ginpalig-on ang determinasyon kag kahandaan sang mga Pulang hangaway nga ipa-



tuman ang taktikal nga opensiba.

Sa paglunsar sang reyd nga wala lupok, naipakita sang BHB "kon paano makakuha sang armas nga wala sang namatay ukon nabuhinan sang nagkalamatay," paathag ni Ka Nado. Epektibo man napangin-wala sa wala lupok nga reyd ang kabutigan sang kaaway nga terorista ang BHB.

Kadalag-an man sang reyd ang napakita nga labing pagbaskog kag paglapad sang suporta sang pumuluyo sa ila hangaway kag ang labing pagdalom sang pagsalig nila sa ikasarang sang BHB sa paglunsar sang mga taktikal nga opensiba. "Labaw nga ginkalipay sang masa ang naagum nga kadalag-an. Nahibal-an nila nga katumbas sang kada kadalag-an nga maangkon sang BHB ang dugang pagpapaluya sa mga kaaway sa sahi."

Lakip sa ginbulig sang pila ka mangunguma sa operasyon sang

BHB ang pagpauntat sang salakyan sa kalsada agud dere-deretso ang operasyon sang BHB. Madamo ang naghatag sang pagkaon, dugang nga impormasyon kag iban pa nga suporta. Sa bulig sang masa, hilway nga nakaatras ang mga kaupod tubtub makalab-ot sa *rallying point*.

Ginsaulog lunsay sang mga pwersa sang BHB kag masang mangunguma diri ang madinalag-on nga reyd.

Ambus sa Villaba, Leyte

Yabi sa kadalag-an sang ambus sa Villaba sadtong Mayo 5 ang mapisan nga hilikuton paniktik kag pagplano. Siling ni Ka Icot, isa ka upisyal sang Mt. Amandewin Command, "Sang mabaton namon ang mandu halin sa nakataas nga kumand sadtong katung-anan sang Pebrero, gilayon nga nagpulong ang kumand sang yunit kag nagpadala sang grupo paniktik para imbestigahan ang hulag sang kaaway kag magtumod sang mapusisyanan."

Pag-abot sang Marso 1, nagreport ang grupong paniktik. Gilayon nga nagmiting ang kumand para sugilanonan ang datos nga ginsumiter sa ila. Matapos ini, naghisugot ang kumand nga mahimo na nga suguran sang BHB ang paghanda para sa ambus. Ginpabalik ang grupong paniktik para mapadalum pa ang ila pagtuon. Kadungan sini, gintukod sang BHB ang kinahanglanon nga istap para madumala sa lohistika, eksplosibo kag iban pa nga kagamitan. Kadungan nga ginpreparar ang mga organisasyon kag baseng masa.

Liwat nagmiting ang kumand sadtong una nga simana sang Abril para konsolidahon ang mga datos kag italana ang partikular nga plano sa ambus. Kadungan sang pagtalana sang petsa sang pag-atake, panapanaho nga naghanda ang hang-

Sundan sa "Leyte..," pahina 12



Mga "humanitarian mission" sang US sa Pilipinas

Instrumento sang pagpasilabot

Sa idalum sang bag-ong kasugtanan sa tunga sang Malakanyang kag gubyrnong US nga nagtukod sang Security Engagement Board (SEB), labi nga agresibo nga ginatapalan sang gubyrnong Arroyo kag militar sang US ang mga aksidente kag iban nga "di-tradisiyunal nga halambalanon" bilang rason sa nagapadamo nga deployment kag pagpasilabot sang mga tropang Amerikano sa teritoryo sang Pilipinas sa porma sang mga "humanitarian mission."

Lampas sa daan nga Mutual Defense Treaty sang 1954 ang ginatawag nga mga "di-tradisiyunal nga halambalanon"- "terorismo, krimen, kaluwasan kag seguridad sa dagat, mga aksidente nga tuga sang naturalisa ukon tawo kag mga epidemya"-bilang basehan para sa "pagbuligay militar" sang US kag Pilipinas. Ang matuod, dugang mga rason ini para makapasulod sang

mga tropang militar ang US sa Pilipinas. Luwas pa ini sa nagapadayon nga pagdagsa sang mga suldado sang US bangud sa paglunsar sang "joint military exercises" sa idalum sang Visiting Forces Agreement. Pamaagi tanan ini para ikamoplahe ang kon usisaon permanente na nga presensya sang mga tropang Amerikano sa pungsod kag mahawan ang dalan sa pagpabaskog

sang pagpasilabot militar kag paglapak sang US sa kahalwayan sang pungsod.

Ang mga "humanitarian mission" sang US gimik lamang para pahamuton ang imahen kag agud mabaton ang presensya nila sa mga lugar nga may estratehiko nga importansya para sa US. Ginalunsar ang mga ini sa katuyuan nga paligunon ang impluwensya kag kontrol sini sa pungsod, palaparon ang erya nga sakup sang operasyon sang mga tropang Amerikano, ikamoplahe ang ginahimo sini nga "social and terrain mapping" kag iban pa nga hilikuton paniktik, magrekrut sang mga mersenaryo kag maghatag sang kinahanglanon nga

Sundan sa "Instrumento...", pahina 13

"Leyte...", halin sa pahina 11

away.

Naglunsar sang tig-duha ka adlaw nga *dry run*. Ginpat-ud man ang kahahndaan sang tim sang mga medik. Ginsarbey mismo sang kumandr ang tereyn. Luwas sa pag-eksakto sang pusisyon sa ambus, gintalana man kon sa diin magpwesto ang *blocking force*. Naglunsar liwat sang tatlo ka adlaw nga *dry run*.

Natapos ang tanan sang paghanda sadtong ulihi nga adlaw sang Abril kag gindesisyunan nga umpisahan na ang martsa pakadto sa *ambush site* sa mga una nga adlaw sang Mayo.

Ginsuguran ang paglakbay sa hapon sang Mayo 4 kag nakaabot sa target ang mga Pulang hangaway banda alas-11 sang gab-i. Natapos ang pagpusisyon bandang alas-6 sang aga sang Mayo 5. Sa aga man nga ina, nag-abot ang target: isa ka Light Ace nga van nga may sakay nga lima ka suldado. Pero ginpabay-an lang ini nga mag-agi bangud

may nakasakay nga sibilyan. Ginhu-lat nila nga bumalik ang kaaway.

Mga alas-11 sang udto, ginpaabot sang *monitoring team* nga ang salakyan nga Light Ace pabalik na halin sa Ormoc City padulong Vil-laba. Naghanda na sang ambus ang mga Pulang hangaway. Makaligad ang 30 minutos, ginpaabot sang ulihi nga *look out* nga malapit na ang kaaway. Pag-abot sang salakyan sa gintalana nga *killing zone*, gilayon ini nga ginapalukpan sang *land mine* kag ginpaulanan sang bala. Gilayon nga napatay ang apat nga suldado kag napilasan ang isa pa. Nasunog ang tatlo ka armas. Gani duha ka armas na lang ang nakuha sang BHB.

Indi mahikayan ang kadalag-an sang BHB sa militar kag pulitika. Para makapanamad gihapon sa BHB, ginpalapta sang 19th IB ang intriga nga ginsunog kuno sang mga Pulang hangaway ang bangkay sang isa sa mga suldado. Pero maabtik nga nagpaathag ang Mt. Aman-dewin Command nga indi hungod

nga nasunog ang bangkay sang suldado. Bangud may karga ang salakyan sang 40 litros nga gasolina, nagdabdad ang ila salakyan ang mapalukpan sang *land mine*.

"Sadtong nagligad nga mga tugig," dugang ni Ka icot, "pauntat-un-tat lamang ang paglunsar sang mga taktikal nga opensiba bangud wala sang nakatumod sa hilikuton paniktik. Pero subong may naitukod na nga grupo nga nagaasikaso sa pang-pangalap sang impormasyon, pagsala kag pagtuon sini, mas nasiguro na ang hulag sang kaaway kag masunson na nakalunsar sang mga taktikal nga opensiba.

Sustenido na nga nakalunsar sang madamo nga magagmay nga taktikal nga opensiba kag pulu-panahon nga may nalunsar nga daku. Prayoridad sa pagpili sang target ang pinakamasupog nga mga elemento nga malubha nga rekord sang pag-pang-abuso sa masa kag may utang nga dugo sa pumuluyo kag rebolusyonaryong hublag. **AB**



"Instrumento..." halin sa pahina 13

impormasyon, abiso kag bulig sa militar sang Pilipinas sa pagbato sa mga armado nga rebolusyonaryong pwersa kag mga pwersang anti-imperyalista. Ginaako mismo sang AFP nga ang US Army ang ginahalanan sang datos paniktik nga ginagamit nila sa ila mga operasyon militar, kag sa partikular sa ginalunsar nila nga operasyon batuk sa mga pwersa sang Abu Sayyaf sa Indanan, Sulu sining una nga simana sang Agosto.

Halin 2004, nagsunson ang paghingalit sang US kag gubyrnong Arroyo sa dalaku nga aksidente sa Pilipinas agud magpasulod sang mga tropang Amerikano sa mga apektadong lugar sa porma sang mga "humanitarian mission." Lakip diri ang pagpalapta sang masobra 920 suldado nga Amerikano sa mga banwa sang Quezon kag Aurora sadtong Disyembre 2004 makaligad nga halitan ang pila ka pulo nga libo nga pumuluyo diri sang mga bagyo, baha kag pag-usmod sang duta. Sa amo man, sadtong Pebrero 2006 mas o menos 1,000 sulado nga Amerikano ang ginpalapta sa Guinsaugon, Southern Leyte kon sa diin masobra isa ka libo nga pumuluyo ang natabunan sang daku nga pagtiphag sang duta.

Halin sining Mayo, isa ka bulan nga nagdungka ang US Navy Ship "Mercy" sa mga baybayon sang Zamboanga, Jolo kag Tawi-tawi. Masobra sa 700 suldado nga Amerikano ang nag-istasyon sa mga nasambit nga prubinsya sa ngalan sang paghatag sang mga serbisyo medikal agud kuno "lubaron ang ugat sang terorismo." Ang ginahimo nga pag-istasyon sang mga suldado nga Amerikano nga may kahanasan medikal katimbang

ang pila ka tuig nga pagpabilin sang mga armadong tropa sang US sa Jolo kag mga kaingod nga prubinsya para sa ginasing "joint exercises" upod ang mga suldado sang AFP.

Pareho man ini sang pagdeploy sang mga pwersang militar sang US sa iban pa nga pungsod sa ngalan sang "pagbulig sa pagsagup kag rehabilitasyon" sa nagligad nga mga tuig. Matapos ang mabaskog nga linog sa Kashmir, Pakistan sadtong Oktubre 2005, nagpadala sang mga suldado ang US didto sang tubtub apat ka bulan. Antes sini, 16,000 nga tropang Amerikano ang gindeploy sang US sa Indonesia kag Sri Lanka matapos ang daku nga tsunami nga naghalit sa baybayon sang Indian Ocean sadtong Disyembre 2004.


Hilway maggamit sang mga eroplano militar sang US ang ere sang Pilipinas sa pagdahilan nga magadul-ong ini sang "relief goods" nga wala na ginainspeksyon sang mga lokal nga awtoridad agud pat-uron nga wala sang mga kagamitan militar. Hilway nga makalagaw sa mga kadagatan sang Pilipinas ang mga barko de-gera sang US sa pagrason nga nagadul-ong sang mga tropang Amerikano sa mga lugar sang aksidente. May pila ka kahigayunan sa nagligad nga mga tuig nga maglagaw kag magdungka ang mga barko mil-

itar sang US sa Zamboanga kag Jolo nga likum sa ihibalo sang mga up-isyal sang gubyrno. Bangud magahatag kuno sila sang seguridad sa mga pwersa sini, hayagan nga nagapalupad sang US sang mga eroplano pangsarbeylans sang magdungka sa Jolo kag Tawi-tawi ang USNS Mercy.

Ginapamilit sadto sang US nga dapat batunon ang presensya sini sa Mindanao bangud sa interes sini nga gamiton ang isla bilang sekondaryo nga lunsaran sang mga operasyon sini sa East kag Southeast Asia. Paserbihon man nga tungtungan ang Mindanao sa pagpusisyon sang mga pwersa sang US sa mga lugar kon sa diin mas mabaskog ang mga rebolusyonaryo kag anti-imperyalista nga pwersa. Isa pa nga kabangdanan ang pagpasulong sang pang-ekonomya nga interes sang US sa Mindanao, labi na sa pagmina. Pero ang pagbato sa mga rebolusyonaryong pwersa sa pungsod amo ang pangunahon nga target sang nagapadamo nga pagpasilabot kag ginahandaan ang direktang agresyon militar sang US sa Pilipinas.

Dapat pamatukan sang pumuluyong Pilipino ang pagsulod sang mga tropang Amerikano sa pungsod, bisan ini yara sa porma sang paglunsar sang mga "humanitarian mission." Husto nga ipamilit nga anuman nga bulig materyal kag pinansyal dapat mag-agi sa mga lokal nga ahensya nga sibilyan ukon mga independyente nga dumuluong nga ahensya nga maki-tawo tulad sang Red Cross ukon Red Crescent. Nagakadapat lamang nga maghulag ang pumuluyo para ihayag ang mga tuso nga katuyuan sang militar sang US sa pungsod kag pamatukan ang pagpasilabot sang US sa mga pangsulod nga halambalanon sa Pilipinas.

AB



Malaparan nga pagtulo sang langis sa Guimaras

KINUNDENA sang grupo nga nagaamlig sa kapalibutan ang gubyernong Arroyo sa indi sini pagpilit sa Petron nga akuon ang responsibilidad sa pagtinlo sa malaparan nga pagtulo sa langis sa baybayon sang Guimaras. Guba ang pangabuhian sang libu-libo ka mangingisda sa isla kag nagtuga sa halit sa kadagatan sang nasambit nga "oil spill" nga natabo sang maglugdang sadtong Agosto 11 ang isa ka barko nga kinontra sang Petron para magdeliber sang duha ka milyon nga litros sang diri sa Pilipinas. Bangud diri, nagguba ang sobra isa ka libo ka ektaryas sang bakawan sa Guimaras. Naglab-ot sa apat ka pulgada ang damol sang langis nga nagalutaw sa dagat nga nagapalibot sa isla. Apektado na ang Negros Occidental sa halit nga tuga sang "oil spill." Nagbalibad ang Petron nga akuon ang bilog nga responsibilidad sa "oil spill" gani wala sang gana ini nga gastusan ang pagtinlo sa langis nga padayon nga nagatulo halin sa naglugdang nga barko. Ang Petron 40% nga ginapanag-iyahan sang Saudi Aramco kag 40% ginapanag-iyahan sang gubyerno sang Pilipinas.

Pagpang-espiya sang US sa mga tawag sa telepono, lapas sa layi

LAPAS sa layi ang pagpang-espiya sang National Security Agency (NSA) sang US sa mga sugilanon sa telepono sang mga Amerikano kag mga tawo sa iban nga pungsod kon wala sang nagakaigo nga permiso ang husgado para diri. Ini ang sabat sang isa ka korte sa US sa kaso nga ginpasaka sang American Civil Liberties Union batok sa ginahimo nga "warrantless surveillance" sang NSA. Suno sa desisyon sang nga ginpagguwa sadtong Agosto 17, ang "warrantless surveillance" lapas sa Foreign Intelligence Surveillance Act kag sa konstitusyon sang US. Wala sang gahum si US Pres. George W. Bush nga imandu ini, siling sang korte. Ginahimo na sang NSA ang amo nga pagpaniid halin pa sadtong 2001 pero sining Disyembre 2005 lang ini nabuyagyag sa publiko sang mabalita ini sa isa ka artikulo sa New York Times.

Himbunanay nga US-Israel kontra sa Lebanon

INDI lamang nahibal-an sang US ang plano nga pagsalakay sang Israel sa Lebanon sadtong Hulyo 12. Direkta ini nga kahimbon sa pagplano kag pagpapatuman sini. Human na ang plano sang US kag sang Israel bag-o pa man matabo ang pagdakop sang mga operatiba sang Hezbollah sa duha ka suldado nga Israeli. Ginamit lamang ini nga bangdanan para umpishan ang opensiba, bombahon kag wasakon ang mga komunidad sa nabagatnan nga bahin sang Lebanon kag sa proseso nga patyonang ginatos nga sibilyan diri.

Ginatumod sang US ang Hezbollah bilang una nga linya sang depensa sang Iran kag Syria batuk sa anuman nga plano nga agresyon sang US sa bahin nga ini sang rehiyon. Ginpapati sang US nga kinahanglan anay mga bungkagon ang ikasarang nga militar kag impluwensya sang Hezbollah sa Lebanon antes maipatuman ang kaugalingon nga sini nga plano nga bombahon kag okuparon ang Iran kag Syria. Sa pagkamatuod, ginatumod sini nga umpisa sang "preemptive strike" sang US

batuk sa mga instalasyong nukleyar sang Iran ang pananalakay sa Lebanon.

Indi katingalahan nga sa unang inadlaw, nagbalibad ang US nga magtawag sang *ceasefire* sa pihak panawagan para diri. Naglaum ang US nga mabungkag sang mga pwersa sang Israel ang Hezbollah sa sulod sang pila ka adlaw kag nagtalana pa ini sang pagbisita sa Lebanon pagkatapos sang una nga simana sang pagpangbomba. Napilitan lamang ini nga magpasugot sa panawagan para sa *ceasefire* matapos ang makangingidlis nga pagpambomba sang Israel sa Qana. Bisan pa man, wala sini ginpakamalaut ang pagatake sang Israel sa Lebanon kag mga paglapas sini sa *ceasefire*.

Wala ginalauman sang US kag sang Israel nga mapaslawan ang ila

mga plano. Sa sulod sang 34 ka adlaw nga padayon nga pagpangbomba, wala natigayon nga waskon sang Israel ang organisasyon kag base nga suporta sang Hezbollah. Sa baylo, napilitan ang Israel nga umatras kag itugyan sa mga pwersa sang United Nation kag Lebanon ang duta nga gintinguha nila nga ukopahon. Nag-ani sang malapad nga kaakig sang pumuluyo ang pamunuan sang gubyerno kag militar sang Israel bangud sa mga kapaslawan. Bangud diri nagaatubang subong sa krisis ang paghahari ang Prime Minister sang Israel. Sa pihak nga bahin, gindeklara sang Hezbollah nga naagum nila ang makasaysayan nga estratehiko nga kadalagan batuk sa Israel. Nagtaas ang prestihiyo kag labi pa nga naglapad ang suporta para sa Hezbollah indi lamang sa sulod sang Lebanon kundi pati na sa mga pungsod sa Middle East.



**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No 16
Agosto 21, 2006
www.philippinerevolution.net

Editorial

Rehimen nga garuk, butigon kag berdugo dapat na nga ibasura

Wala sing kabaraghal na naman nga ginbasura sang mga idu-ido ni Gloria Arroyo sa Kongreso ang kasong impeachment. Waay gani ini ginhatagan sang kahigayunan ang mga nagpasaka sang kaso nga basahon man lamang ang listahan sag tuman kadamo nga naihanda nga ebidensya sang pagdinaya sa eleksyon, korapsyon kag pagpamatay sa mga aktibista kag iban pa nga mabug-at nga krimen ni Arroyo. Basta lamang pinatay sang mga kongresista nga maki-Arroyo ang kaso bangud wala kuno ini sang basehan.


Ang amo nga wala panugan-tugan nga paglapak sa mga proseso nga parlamentaryo kag ligal liwat nagpakita sang desperasyon ni Gloria Arroyo nga magkapyot sa poder. Sa pagbasura nga ini sang kasong impeachment, ginsara na sang rehimeng Arroyo ang nabilin nga parlamentaryong proseso nga ginalauman sang pumuluyo sa idalum sang subong nga Kongreso para mabuyagyag ang mga kasal-anan sang rehimen kag mabayluhan ini. Labi lamang nga ginahayag sang rehimeng Arroyo ang kaugalingon nga kagarukan, kadalukon kag pagkatuso, kag labi lamang sini nga ginahamulag ang kaugalingon sa pumuluyo. Bunga sini, labi nga nagalapad ang kubay sang pumuluyo nga nagapati nga wala subong sang

iban nga mapilian kundi ang dalhon ang away sa karsada kag sa armadong paagi agud matapos na ang di lehitimo, korap, papet kag brutal nga pagginahum ni Gloria Arroyo.

Ang pagbasura sa kasong impeachment amo ang pinakaulihi lamang sa malaba nga serye sang mahigko nga maniobra kag mapintas nga atake sa mga pwersa nga nagabato sa rehimeng Arroyo.

Kamot-nga-salsalon ang pangunahon nga sandigan ni Arroyo agud makapabilin sa poder. Paagi sa malaparan nga pagpamatay kag pagkuot sa mga aktibista, mga ginasuspetsahan nga rebolusyonaryo, iban pa nga mga kaaway sa pulitika kag pati mga inosenteng sibilyan, nagasabwag siya sang kakugmat sa desperadong handum nga paatrason kag dugmukon ang malapad nga kahublagan para patalsikon siya.

Lapnagon nga ginalapak ni Arroyo kag mga kahimbon kag idu-ido niya ang mga kinamatarung sibil paagi sang mga pasistang tikang kag mandu pareho sang pagdumili sa mga matawhay nga paghulag kag pagpang-aresto sa mga nagarali. Makahas nga ginalimitahan kag ginabungkag ang nagkalain-lain nga paghulag sang pumuluyo. Ginapakuot, ginapapatay ukon indi ginaipit kag ginahunong ang iya mga pangontra. Nagahari ang terorismo sang estado sa malapad nga kaumhan



**Mga tampok sa
isyu nga ini...**

**Super regions:
Super-pantasya
ni Arroyo** PAHINA 4

**Kleriko-pasista nga
dokrtina ni Intengan** PAHINA 7

**Instrumento sg
pagpasilabot: Mga
humanitarian mission
sg US** PAHINA 12

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*